



QUÆSTIO MEDICA,  
QUODLIBETARIIS DISPUTATIONIBUS  
MANE DISCUTIENDA.

In Scholis Medicorum die 14. mensis Januarii Anni 1706.

M. JOANNE BAPTISTA FERME LHUIS

Doctore Medico Præside.

*An omni alvi fluxui radix Brasiliensis?*

I.

**S**PECIFICORUM nomine apud multos nihil præstantius. Omnem paginam adimplent, artem superant & artifices. Naturæ donum, non laboris pretium. Ambitu suo ac energiâ complectuntur morbi causas, characterem, tempora & eventus, nihilque domino relinquunt quod circumspiciat. His aut omnes, aut peculiares morbi tam promptè, tam facillè sedantur, quasi divinius id factum prodigio simillimum videretur. Ne mireris igitur, si horumce remediorum divites, populus novitatis sequax, ut deos titulares veneratur. Quid ultra? Ipsos medentes circumforaneis servire aliquando videmus in artis dedecus! Quot vidimus nostra ætate ex antiquorum thesauris specifica, ut nova inventa emergere, quorum magnum inde non in inventores redundavit nomen, sed in eos qui fuco & audaciâ, illa indiscriminatim ad varias infirmitates sæpissime expetiti sunt! Quid enim tam absurdum est quod non arrideat populo, si conditum temeritate offeratur? Rudem populus demiratur, loquaci plaudit, audaci assentitur, & si quid mali commiserint, in medentes refundit. Quantum in Medico scire convenit, tantum in Agyrta ignorasse prodest, ut à populo laudari mereatur, & apud quosdam magnates valeat. Ne mireris igitur, si specifico fretus, urbem tam citò suo nomine impleat. Inter hæc specifica primas visâ est habuisse partes *radix Brasiliensis*, aliquandiu omnibus alvi fluxibus adhibita. Hujus verò remedii fama te commovet: eventus disparis te ancipitem reddunt? Artis magistros consule. Audies alvi fluxuum dissimiles causas, nonnisi disparibus remediis profligari posse. Norunt tempora & momenta: vires explorant quid ferre valeant, quidve recusent. Horum industriâ huic alvi fluxui prodest remedium, & specificum efficitur, quod alteri lethale foret. Sic corticis Peruviani fama contracta nunc viger; sic opii stupendos felicesque effectus demiramur, *Medicamentorum* temeritate nunquam satis metuendos.

II.

**S**PECIFICI tamen vocabulum apud populum & quosdam magnates plurimum valere mitum non est. Verbis ferè omnes, ac voce delectantur, non rebus. Delirantis Chymici, impudentis Agyrtæ, vociferantis Fratelli, mulierculæ

A

garrientis, grunnientis rustici, jurantis militis clamoribus ad cælum usque evehi specifici virtutes & ampliari eventus novum non est, sed experientiâ quotidianâ notum. Nihil in hac urbe frequentius: horum proscriptionibus compita obducuntur; his circumvestiuntur atria domuum religiosarum, quarum in recessu quasi è tripode oracula fundit Hippocrates cucullatus. Est verò alia non minùs metuenda Agyrtæ species. Vis talem tibi adumbrari? Inter viros litteratos sæpissimè viget: ejus enim mens aliorum sententiis ita concinnè decoratur, ut tamquam area diversis, alienique soli floribus micans videatur, modò ea omnia quæ spontè producit, diligenter eradicentur. Florida gens, sed sterilis: aliorum indolem acriter increpans, illosque omnes sigillatim falsè discriminans. Hunc fortasse crederes Medicinæ opibus ditari? minimè. Omni genere scientiarum instructus censetur, Medicus tamen absque medicamentis. Ad ægotantem accersitur, cum intuetur, & expectat eventus, præterque phlebotomiam, quam ad omnes morbos usurpare solet, nihil illi præteribit. Itaque cave ab illo, qui præterea zelotypiâ afficitur. Nostrium domus nulla, quæ specifici rumore non se sonet, ac nomine Agyrtæ non impleatur. At unius temporis edacitate consumitur populi & magnatum consensu in altum assurgens illorum hominum fama, & labefactatur. Id enim fuit inter illos & veros medentes discriminis, ut quantum in medicis ad artem exercendam laboris, industriæ, vigiliarum, cautionis, prudentiæ, observationis, modestiæ, æconomix animalis cognitionis requiretur: tantumdem eorum omnium desideraretur in illis. Sic sentire debuisset, qui primam meam Thesim de illâ materiâ se multo labore castigasse, & novam pro illâ confecisse jactitabat: magis concinnâ oratione loqui, qui scribendi meam rationem emendare posse se existimabat, & diligentius arti incumbere, qui meam in arte experientiam opusque ementiri ausus est. Cùm tamen Facultas Medica à Baccalaureo decepta, Thesim hanc subditiâ chirographo meo non munitam, me etiam inconsulto, typis mandari permisisset, decrevit me aliam conditurum, quàm me himetipsi, Facultati Medicæ, & Publico restituere valerem.

## III.

**V**IS omnium alvi fluxuum causas accuratè cognoscere? Intestinorum constructionem, liquoresque, qui in anfractuosis ipsorum ductus delabuntur, prudenter attendas. In illis non solum alimentorum reliquiæ committuntur, sed quidquid alieni benemorata sanguinis moles ferre recusat, in illis deponitur ex ultimis corporis finibus. E proximis visceribus, è capite, pulmonibus, hepate, liene, & glandulis mesenterii, è renibus undique accedunt, & in ipsos depluunt post acta diu domestica bella, modò funerati sanguinis, modò subactarum quibus premebatur partium reliquiæ. Hinc mirum non est si prudens de alvi fluxibus diversum sentiat. Nam alvi fluxus in omnibus penè morbis occurrit: nullum morbi tempus affectat; numquam impunè ægrum adoritur. Frequenter solvit morbum. Omni ætate hominem lacessit: vagientem in cunis, dentium eruptionem comitatur, lactis tumultus sequitur, grandiorum hominem omni tempore, omni tempestate cruciat: modò sincerus, modò epidemicus. Hunc aquæ, aër, victus, cælum, labor sævire faciunt. Quis homo sanæ mentis velit omnibus adhibere medicinam eandem? Propterea alvi fluxus interdum canalis morbus, interdum alterius morbi comes aut soboles curandus accedit. Solus artifex novit quod sit inter utrumque discrimen. Qui canalem lædit, quàm varius! quot partes ipsum coagmentant! quot liquida canalem cundo alluunt! Quot huic commolenda, trituranda, diluenda offeruntur alimenta: tot alvi fluxuum species pariunt, si quid vitii contraxerint. Ex iis jam satis, ut opinor, non omnes alvi fluxus eodem remedio profigari posse intelligis,

uno specifico, videlicet *radicis Brasiliensis* usu. Hos ex ordine perlustra, & veritas omnibus scite ponderatis, illucescet.

## IV.

INTER illas alvi fluxus species, cita alvi dejectio, quam cibus vel liquidus, vel lubricus, vel pinguis, vel multus parit, prima numeratur, & facillime diætâ curatur, si primo errori alter non accesserit. Ex iis quæ exeunt statui debent profluviorum differentia. Si cruda, aquosa, diluta, humentia, colore subalbida, cinerea, graveolentia, idque solo ventris rugitu, vel nullo manifesto torminum dolorisque sensu foras erumpunt, *lienteriam* aut *caliacam* affectionem jure dixeris. *Caliacam*, si quæ ejiciuntur levia, æqualia, suisque similia, chyli aut cremoris speciem referant: *lienteriam* verò, si inæqualia & dissimilia, cibis nec obtritis nec immutatis confusè secedant. *Diarrhæa* altera alvi fluxus species: dum genuina est, sinceriorum humorum sine vehementi sensu doloris effluxu, discernitur. Hinc sæpe pituita, aliàs bilis flava, aliàs atra foras purior secedit. Est & intestinorum colliquatio, quæ ad diarrhæam referri potest, in qua quod infernè procedit, quasi adipe & oleo persusum cernitur. Familiare est hoc profluvii genus pestilenti febri, causo colliquanti, hecticæ, necnon phthyi & atrophie, nonnunquam inflammationibus. Diarrhæa senes adoritur. Arescentes fibræ canalis exsiccata hanc pariunt, solitis muneribus obeundis impares. Est demum alvi fluxus, qui *dysenteria* dicitur. Cruenta est alvi dejectio cum dolore & ventris torsione: ut hujus causæ variæ, sic species diversæ. Aut mucus intestinorum expellitur, deinde adeps intus adhærescens exiguo cruore perfusus: eaque prima est dysenterie species: altera, cum interior intestinorum tunica corraditur, cujus pelliculæ & fibræ dejectionibus persusæ apparent; tertia, cum aliùs penetrante aut depascente ulcere, ipsa caro, propriaque intestini substantia putris vel exesa procedit; tandem *tenesmus* adest, quo tempore assidua defendendi cupiditas sollicitat, sed quâ nihil ferè præter muscosum quid & subcruentum egeritur. Hæc omnia propriis signis nosse expedit, ut tuta sit curatio; quam ratione causarum, eventuum, progressuum, & ægri virium variè instituendam, & diversis remediis & cautionibus obtinendam prudenter à medicinæ primordiis ad hæc usque tempora judicarunt sagaciores artis Magistri.

## V.

QUAMVIS in praxi medica nihil deterius vel magis exitiale, quam indefinita illa fides quæ plurimis specificis vulgò adhibetur, quibuldam tamen utitur prudens physicus Medicus. Enimverò non solum *Medicum*, sed etiam de terrâ *Medicinam creavit Altissimus*, sub diversis speciebus, à quibus vir sapiens non abhorrebit. Nonne mercurio lucis venerea extinguitur? Cortice Peruviano febres sedari perspicuum est, opio dolores leniri, radice Brasiliensî plurimos alvi fluxus compesci; si opportunè illa omnia sint adhibita. Nonne à ligno indulcata est aqua amara? Qui illorum, plurimorumque aliorum virtutes negat, artem ignorat. At multi, inquis, circulatores illis temerè abutuntur in artis magistrorum dedecus, quos imitati conantur? Quid amularis pro eis? Quis tribuat ut omnis populus propheta, & det eis Dominus Spiritum suum? Radicem Brasiliensem, urges, omnibus alvi fluxibus indiscriminatim adhibent? Eos aberrare, modeste, ut veri est Medici, probemus. Radix illa est fusci coloris, saporis ingrati, amari, calidi & acris: per vomitum & secessum materiam viscidam deturbat, & post se vim astrictivam relinquit, quâ tonus partium restituitur. An tantæ & tales virtutes omnium alvi fluxus causarum indicationes adimplebunt? Si diarrhæa valentioribus catharticis inchoata, & catharsi imprudentius, aut iniquo tempore cele-

brata superveniens, hancne credis radice<sup>4</sup> illâ sedari posse? Id malè fecit aliquando exedens medicamentum; id sæpe vitiosum & acre alimentum, cujus si adurentes fluidioresque particulæ cruori permixtæ fuerint, ne credas canalis & cruoris vitia radice illâ reparari. Fit aliquando aliarum partium consensu, ut in infantibus, cùm dentes prominuli exitum parant, à pituita viscidiorè & acri in ventriculum erumpente. Observatum est plus vice simplici periculosam peperisse licenteriam, quæ si curam admisisset, eam radix illa famosa numquam produxisset. Præterea si sit phlegmosos, vel luis veneretæ, vel scorbuti soboles, putasne illum radice sanari? Hujus famâ accersitus quisquis sit, didicit exemplo artificum, illâ non uti, & sæpissimè in aliud tempus reservare: didicit aliorum monitis & consilio virtutes radices munire, & reddere tutiores, venæ sectione, opiatas chalybeat, aliisque quasi auxiliariis copiis. Itaque è veteribus suis ornamentis & auctoritate plurimum decedit specificum istud; & si quæ sit illius energia, tota debetur artifici, cujus est morbum nosse, notare tempora, modum statuere, definire dosim, & cautiones adhibere.

*Ergo non omni alvi fluxui radix Brasiliensis.*

### Domini Doctores disputaturi.

*M. Nicolaus Andry, Professor*    *M. Petrus Jacquemier.*

*M. Antonius le Moine.*

*Regius.*

*M. Claudius du Fresno.*

*M. Philippus Herquet*

*M. Guido Crescentinus Fagon,*  
*Regi à Sanctoribus Consiliis,*  
*& Archiatrorum Comes.*

*M. Antonius le Clare.*

*M. Joannes Baptista Chomel, à*  
*Regia Scientiarum Academi-*  
*nia.*

*M. Jacobus de Bourges.*

Proponebat Parisiis JOANNES-BAPTISTA PROCOPE  
CUTEAUX Parisinus, Baccalaureus Medicus,  
A. S. R. H. 1706.